

Schwarz-Schilling: Mora se iskoristiti mogućnost za restrukturiranje policije

Dogovor o restrukturiranju policije, koji su skoro prihvatili ključni lideri prošlog mjeseca, i dalje je na stolui treba zgrabiti mogućnost koju taj dogovorpredstavlja za Bosnu i Hercegovinu, rekao je visoki predstavnik i specijalni predstavnik Evropske unije Christian Schwarz-Schilling u svom današnjem govoru.

“Perspektiva ove zemlje će postati mnogo bolja onoga dana kada se potpiše Sporazum o stabilizaciji i pridruživanju,” izjavio je Christian Schwarz-Schilling jna konferenciji koju organizira Fondacija Konrad Adenauer, te dodao: “Glavna prepreka, iako ne i jedina, potpisivanju Sporazuma je pitanje restrukturiranja policije.”

Konferencija pod nazivom *Pedeset godina Rimskih sporazuma i budućnost Zapadnog Balkana*, i održana je danas u rezidenciji Konak u Sarajevu.

U govoru koji se dotakao mnogih pitanja visoki predstavnik i specijalni predstavnik Evropske unije je uporedio situaciju u Evropi 1957. godine sa situacijom u Bosni i Hercegovini danas.

“Evropska unija je jednim dijelom nastala kao rezultat rata te ekonomskog i socijalnog kolapsa,” rekao je Christian Schwarz-Schilling. “Ova činjenica je u direktnoj vezi sa nastojanjima naroda zapadnog Balkana da se približe Evropskoj uniji te da blagovremeno postanu njeni članovi.

“Ova poruka mora biti potpuno jasna i svima u Bosni i Hercegovini,” nastavio je Christian Schwarz-Schilling. “Dvanaest godina nakon završetka sukoba na ovim prostorima,

građani i lideri ove zemlje suočavaju se sa mnogim izazovima i odlukama sa kojima su se 1957. godine suočavali građani Evrope – dvanaest godina nakon završetka Drugog svjetskog rata.”

Visoki predstavnik i specijalni predstavnik Evropske unije naglasio je da neki ljudi izgleda vjeruju da se zemlja nije u stanju integrisati u Evropu zbog stalnih nesuglasica, nepovjerenja i uzajamnog optuživanja, što je nusproizvod rata.

“Ovi ljudi su sigurno premladi da bi se sjećali nepovjerenja i optuživanja u ostatku Evrope nakon rata koji je trajao od 1939. do 1945. godine,” nastavio je. “Ja nisam. Ja sam bio mladić 1957. godine i dobro se sjećam koliko je Evropa tada patila zbog ogorčenja i poremećaja izazvanih Drugim svjetskim ratom.

Uprkos tome, državnici koji su prije pola vijeka bili začetnici Evropske unije bili su u stanju da vide dalje od njihovih trenutnih teškoća prema prosperitetnoj i sigurnoj budućnosti na obzoru. To je ono što danas trebaju učiniti lideri Bosne i Hercegovine.”

Visoki predstavnik i specijalni predstavnik Evropske unije je naglasio da uspjeh Evropske unije nije bio historijski predodređen i da je bio i još uvijek jeste izuzetna priča o trijumfu utemeljenom na različitostima.

“U Evropi je 1957. godine vladalo prilično sumorno raspoloženje,” rekao je visoki predstavnik i specijalni predstavnik EU. “Osnovna sredstva za život su još uvijek bila prilično ograničena, zdravstvene i socijalne usluge su bile nedovoljno razvijene, siromaštvo je bilo sveprisutno, a građani su živjeli u strahu da je kraj Drugog svjetskog rata 1945. godine predstavljao tek stišavanje, a ne i okončanje nestabilnosti i sukoba koji su obilježili historiju evropskog kontinenta.”

Christian Schwarz-Schilling je naglasio da je njegova zemlja, Njemačka, bila podijeljena, da je Evropa bila podijeljena u

dva žestoko naoružana vojna bloka i da su samo četiri mjeseca prije toga sovjetski tenkovi ugušili pobunu u Mađarskoj.

“Pola stoljeća kasnije, siguran sam da bi potpisnici Rimskog ugovora bili iznenađeni uspjehom svoje inicijative,” rekao je Schwarz-Schilling na konferenciji dodajući da je Rimski ugovor značajan, prije svega, “jer je najavio raskid s prošlošću”.

“Dvanaest godina nakon najvećeg sukoba u historiji čovječanstva, države koje su učestvovala u ratu odlučile su da stave u stranu svoje razlike zarad budućnosti narednih generacija,” rekao je Christian Schwarz-Schilling dodajući: “Ova odluka je promijenila izgleda jednog cijelog kontinenta, ne samo sudbine šest zemalja osnivača. Ta odluka i dalje ima potencijal da transformira i one dijelove Evrope koji ostaju izvan Evropske unije.”

Visoki predstavnik i specijalni predstavnik Evropske unije je jasno predočio da Evropska unija nije ekskluzivan klub. “To je inkluzivna zajednica država koje su prevazišle, i koje i dalje prevazilaze, ogromne prepreke u cilju izgradnje prosperitetnih i demokratskih društava,” rekao je Schwarz-Schilling.

“U 50 godina, Unija se proširila sa šest na zajednicu od 27 država”, rekao je dalje gospodin Schwarz-Schilling. “U tom procesu, ona je pomogla da se ujedini tada razjedinjen kontinent, prihvatanjem u članstvo zemalja tadašnje istočne Evrope, uključujući i Sloveniju 2004. godine, te Bugarsku i Rumuniju početkom ove godine.”

Visoki predstavnik i specijalni predstavnik Evropske unije naglasio je da se Evropska unija sada proteže od Atlantika do Mediterana i Crnog mora te u potpunosti okružuje područje zapadnog Balkana, koji je “geografski, kulturološki, politički, ekonomski i socijalno svakako unutar evropske porodice”.

On je takođe naglasio da će, u narednim godinama, Evropska unija neizbježno igrati sve veću ulogu u svim zemljama na

zapadnom Balkanu. "Evropska unija je već nekoliko puta dala jasno obećanje svim zemljama u ovom regionu da se mogu nadati izgledima za punom integracijom u njene strukture, ako i kada ispune političke i ekonomske uslove," rekao je Christian Schwarz-Schilling.

"Iako se u nekim zemljama članicama posljednjih godina osjeća zasićenost procesom proširenja, Evropska unija i dalje će pružati snažnu podršku zapadnom Balkanu," nastavio je Christian Schwarz-Schilling. "Na kraju, ovdje se ne radi toliko o proširenju Evropske unije, koliko o njenom zaokruživanju."

Hrvatska bi trebala postati članica Evropske unije za par godina; Albanija i Bivša Jugoslovenska Republika Makedonija sada su također na putu ka članstvu; a i Crna Gora se sigurno kreće u istom pravcu, rekao je na konferenciji.

"Samo Bosna i Hercegovina i Srbija tek treba da potpišu Sporazum o stabilizaciji i pridruživanju," zaključio je visoki predstavnik i specijalni predstavnik Evropske unije.